

四庫全書

子部

欽定四庫全書

集部

歲時雜詠卷三十六

三至

詳校官庶吉士

臣柳邁祖

助教

臣

常循履勘

總校官中書

臣朱

鈐

校對官典簿

臣郭祚熾

職

騰錄舉人

臣查

浩

欽定四庫全書

歲時雜詠卷三十三

宋蒲積中編

重陽

九日作

并序

陶潛

余愛重陽之名秋菊盈園而持醪靡由空服九華寄  
懷於詩

世短意恒多斯人樂人生日月依辰至舉俗愛其名露  
淒炎風息氣結天象明往燕無遺影來雁有餘聲酒能

祛百慮菊解製顏齡如何蓬廬士空視時運傾塵爵恥  
虛壘寒花徒自榮斂衿獨閒謠緬焉起深情棲遲固多  
娛淹留豈無成

已酉歲九月九日作

靡靡秋已夕淒淒風露調蔓草不復盛園林空自凋清  
風澄餘澤遙然天界高哀蟬無歸響叢雁鳴雲霄萬化  
相尋異民生豈不勞自古皆有沒念之使心慙何以報  
我情濁酒且自陶十載非所知聊以永今朝

九日從宋公戲馬臺送孔令 謝 瞻

風至授寒服霜降休百工繁林收陽彩密苑解華鼓巢  
幕無留鷺遵渚有歸鴻輕霞冠秋日迅商薄清穹聖心  
眷佳節揚鑒戾行宮四筵霑芳醴中堂起絲桐扶光迫  
西泥音似餘歡宴有窮逝矣將歸客養素克有終臨流怨  
莫從歡心歎飛蓬

又

謝靈運

季秋邊朔苦旅雁違霜雪淒淒陽卉腓皎皎寒潭潔良

辰感聖心雲旗興暮節鳴葭戾朱宮蘭卮獻時折餞宴  
光有孚和樂信所缺在宥天下理吹萬羣芳悅歸客遂  
海隅脫冠謝朝列弭棹薄枉渚指景待樂闋河流有急  
瀾浮駭無緩轍豈伊川途念宿心愧將別彼美丘園道  
喟焉傷薄劣

侍皇太子九日玄圃宴

四言

王儉

秋日在房鴻雁來翔寥寥清景藹藹微霜草木搖落幽

蘭獨芳眷言淄苑尚想濠梁既暢旨酒亦飽薇猷有近  
斯悅無遠不柔

九日賦韻

梁簡文

是節協陽數高秋氣已精蟾芝逐月啟帷風依夜清遠  
燭成歌黛斜橋聞履聲梁塵下未息共愛賞年并

九日侍宴樂遊苑正陽堂

劉苞

上郡良家子幽并遊俠兒立乘爭飲羽側騎競紛馳明  
珂飾華旄金袍映玉羈膳羞殫海陸和齊視秋宜雲飛

雅琴奏風起洞簫吹曲終高宴罷景落樹陰移微薄烝  
嘉惠飲德良不貲取效績無紀感恩心自知

九日

王修己

霜威始落翠寒氣初入堂隋珠爛似燭縣黎疑夜光

九日酌菊花酒

劉孝威

霜花疑始摘羅衣似適薰餘杯度不取欲持嬌向君

九日侍宴樂遊苑

為西臺  
侯作

何遜

皇德無餘讓重規襲帝勛垂衣化比屋眷顧慎為君羈



飛悅有道卉木荷平分神襟動時豫歲序屬涼氛城霞  
朝晃朗槐霧曉氤氲驚興和八襲鳳駕啟千羣羽觴歡  
湛露侑舞奏承雲禁林終晚宴華池物色曛疏樹翻高  
葉寒流聚細文日斜迢遞雨風起差峩雲運偶參侯服  
恩洽厠朝聞於焉藉多幸歲暮仰遊汾晴軒連瑞氣飛  
惹御香芬

九日宴樂遊苑應令

庾肩吾

轍迹光周頌巡遊盛夏功鉤陳萬騎轉閭闔九關通秋

輝逐行漏朔氣繞相風獻壽重陽節迴驚上苑中疏山  
開輦道閒樹出離宮玉醴吹花菊銀床落井桐御梨寒  
更紫仙桃秋轉紅飲羽山西射浮雲冀北驄塵飛金埒  
滿葉破柳條空騰猶疑矯箭驚雁避虛弓雕盤濫杞梓  
花綬接鸛鴻媿乏天庭藻徒叅文雅雄

九日從駕

王褒

黃山獵地廣青門官路長律改三秋節氣應九鍾霜射  
馬垂雙帶豐貂佩兩璜苑寒梨樹紫山秋菊葉黃華露

霏霏冷輕颺颺颺傷終慙屬車對空假侍中郎

五言同管記陸瑜九日觀馬射

陳後主

晴朝麗早霜秋景照堂皇  
榦慘風威切荷彫池望荒樓  
高看雁下葉散覺山涼歇  
霧含空翠新花濕露黃飛禽  
接即影度日轉鉞光連翩  
北幽騎馳射西園傍勒移  
瑪瑙色鞭起珊瑚揚已同  
過隙遠更異良弓藏且觀  
千里汗仍瞻百步楊非為  
從逸賞方追塞外羌

衡州九日

江總

秋日正淒淒，茅茨復蕭瑟。姮人薦初醞，幼子問殘疾。園菊抱黃華，庭欄剖朱實。昨以著書情，暫遣他鄉日。

奉和九月九日

賀 勳

商飈凝素蕊，玄覽賁黃圖。曉霜驚斷雁，晨吹結相烏。寒花低岼菊，涼葉下庭梧。澤宮申舊典，相圃叶前模。玉砌分雕戟，金溝轉鏤衢。帶星飛夏箭，映月上軒弧。慶展簪裾洽，恩融雨露濡。天戈發丹篆，寶思掩玄珠。承歡徒聳

忤負弛竊忘軀

九月九日贈崔使君善為

王績

野人迷節候端坐隔簾埃忽見黃花吐方知素序迴映  
岩千蕊發臨浦萬株開香氣徒盈把無人送酒來

又

崔善為

秋來菊花氣深山客重尋露葉疑涵玉風花似散金摘  
來還泛酒獨坐即徐斟王弘貪自醉無復覓楊林

九月九日

九日重陽節三秋李月殘菊花催晚氣萸房避早寒霜  
濃鷹擊遠霧重雁飛難誰憶龍山外蕭條邊興闌

又

唐高宗

端居臨玉宸初律啟金商鳳闕澄秋色龍闈引夕涼野  
淨山氣斂林疎風露長砌蘭戲半影岩桂發全香滿蓋  
荷彫翠圓花菊散黃揮鞭爭電烈飛羽亂星光柳空穿  
石碎弓虛側月張怯猿啼落岫驚雁斷分行斜輪低夕  
景歸旆擁通莊

奉和九月九日應制

許敬宗

爽氣申時豫臨秋肆武功太液朝光發層城佳氣融繁  
霄寒暑麗黃山極望通講藝遵先軌覩德暢宸衷驚嶺  
飛夏服娥魄亂雕弓汗浹流赭塵生埒散紅飲羽驚  
開石中葉遽凋叢雁殫雲路靜烏墜日輪空九流參廣  
宴萬寓抃恩隆

江令於長安歸還揚州九月九日行微山亭賦

江韻

心逐南雲遊形隨北雁來故鄉籬下菊今日幾花開

擬江令

本逐征蓬去還隨落葉來菊花應未滿許待詩人開

又擬

遊人倦蓬轉鄉思逐鴻來偏想臨潭菊芳藥對誰開

九日懷封元寂

王勃

九日郊原望平野遍霜成蘭氣添新酌花香染別衣  
秋良會少千里故人稀今日龍山外當憶雁書歸



蜀中九日

九月九日望鄉臺他席他鄉送客懷人今已厭南中苦  
鳴雁那從北地來

九日

九日重陽節門門有菊花不知來送酒若箇是陶家

九月九日登玄武山旅眺  
邵大震

九月九日望遙空秋水秋天生夕風寒雁一向南飛遠  
遊人幾度菊花叢

又

盧照隣

九月九日眺山川歸心歸望積風烟他鄉共酌金花酒  
萬里同悲鴻雁天

和九月九日登慈恩寺浮圖應制

張錫

九秋霜景淨千門曉望通仙遊光御路瑞塔迥凌空菊  
彩揚堯日萸香遶舜風天文麗辰象竊抃仰層穹

又

蕭至忠

天蹕三乘啟星輿六轡行登高臨寶塢目極遍王城神  
衛虛中遶仙歌雲外清重陽千萬壽率土頌昇平

又

解琬

瑞塔臨初地金輿幸上方空邊有清淨覺處無馨香雨  
霽微塵斂風秋定水涼茲辰採仙菊薦壽慶重陽

九月九日宴江陰

杜審言

蟋蟀歸期晚茱萸節候新降霜青女月送酒白衣人高  
興要長壽卑棲隔近臣龍沙即此地舊俗坐為隣

湘州九日城北亭子

張說

西楚茱萸節南淮戲馬臺寧知沅水上復有菊花杯  
亭帳憑高出親游自遠來短歌將急景同使興情催

九日陪登高陰行先

重陽初啟節無射正飛灰寂寞風蟬去聯翩霜雁來  
山棠紅葉下岼菊紫花開今日桓溫座空媿孟嘉才

岳州九日宴道觀西閣

搖落長年歎蹉跎遠宦心北風嘶代馬南浦宿陽禽  
佳

此黃花酌酣餘白首吟涼雲靈楚望濛雨蔽荆岑登眺  
思清景誰將眷濁陰釣歌出江霧樵唱入山林魚以嘉  
名採木為美材侵大道由中悟逍遙匪外尋參佐多君  
子詞華妙賞音淹留洞庭觀望古意何深

九日進茱萸山詩五絕

五言

家居洛城下舉目見嵩山刻作茱萸節情生造化間  
黃花宜泛酒青岳好登高稽首明庭內心為天下勞  
菊酒攜山客萸囊繫牧童路疑尋大塊人似問鴻濛

九日重陽數三秋萬寶成時來謁軒后罷去坐蓬瀛  
晚節歡重九高山上五千醉中知遇聖夢裡見尋仙

九日侍宴賦

得時字

蘇頲

嘉會宜長日高游順動時曉光雲半洗晴色雨餘滋降  
鶴因韶德吹花入御詞願陪陽數節億萬九秋期

九月九日望蜀臺

蜀王望蜀舊臺前九日分明見一川北牀鄉關方自此  
南辭城郭復依然青松繫馬攢岩畔黃菊留人籍道邊

自昔登臨湮滅盡獨聞忠孝兩能傳

九月九日登龍山

張九齡

郡庭常窘束涼野求昭曠楚客凜秋時桓公舊臺上清  
風明日好歷落江山望極遠何蕭條中留坐惆悵東彌  
夏首濶西拒荆門壯夷險雖異時古今豈殊狀先賢渺  
不接故老猶可訪披帛傷昔人揮斤感前匠自惟本疎  
散未始忘幽尚際會非有欲往來是無妄為邦復多幸  
去國殊遷放且泛籬下菊還令郢中唱灌園亦何為於

陵乃逃相

歲時雜詠卷三十三



欽定四庫全書

歲時雜詠卷三十四

宋 蒲積中 編

重陽

奉和聖製重陽節宰臣及羣官上壽

王維

四海方無事三秋大有年  
百生逢此日萬壽願齊天  
芍藥和金鼎茱萸插玳筵  
玉堂開右个天樂動宮懸  
御柳疎秋景城鴉拂曙烟  
無窮菊花節長奉柏梁篇

九月九日憶山東兄弟

時年十七

獨在異鄉為異客每逢嘉節倍思親遙知兄弟登高處  
遍插茱萸少一人

九日

孟浩然

初九未成旬重陽即此晨登高聞古事載酒訪幽人落  
帽恣歡飲授衣同試新茱萸正可佩折取寄情親

九日龍沙寄劉大春虛

龍沙豫章北九日挂帆過風俗因時見湖山發興多客

中誰送酒榼裏自成歌歌竟乘流去滔滔任夕波

途中九日懷襄陽

去國已如昨倏然經杪秋峴山杳不見風景令人愁誰採籬下菊應閒池上樓宜城多美酒歸與萑彊遊

和盧明府九月九日峴山宴馬使君崔員外

宇宙誰開闢江山此鬱盤登臨今古用風俗歲時觀地理荊州分天涯楚塞寬百城今刺史華省舊郎官共美重陽節俱懷落帽歡酒邀彭澤載琴轍武城彈獻壽先

浮菊尋山或藉蘭烟虹鋪藻翰松竹挂衣冠叔子神如  
在山公興欲闌常聞騎馬醉還向習池看

九月九日登峴山寄張容

北山白雲裏隱者自怡悅相望試登高心隨飛鳥滅愁  
因薄暮起思是清秋發時見歸村人沙行渡頭歇天邊  
樹若薺江畔舟如月何當載酒來共醉重陽節

九日陪潤州邵使君登北固山

張子容

五馬向山椒重陽出麗譙徐州帶淶水楚國在青霄張  
幕連江樹開筵接海潮凌雲詞客語迴雪舞人嬌梅福  
慙仙吏羊公賞下僚新豐酒舊美況是菊花朝

重陽日陪元魯山德秀登北城矚對新霽因以  
贈別時元兄屢有桂冠之意 蕭穎士

山縣遶古堞悠悠快登望雨餘秋天高目盡無隱狀  
綿連滄川迴杳渺鴉路深彭澤興不淺臨風動歸心  
賴茲鳴琴暇傲睨傾菊酒人和歲已登從政復何有

遠山十里並一道，銜長雲，青霞半落日，混合疑晴曛。  
漸聞驚栖羽，坐歎清夜月中歡。愴有違行子，念明發  
僅能泯寵辱，未免傷別離。江湖不可忘，風雨勞相思。  
明時當盛才，短伎安所設。何日謝百里，從君漢之滌。

宣城九日聞崔侍御宇文太守游敬亭余時登

響山不同此賞醉寄崔侍御

二首

李白

九日茱萸熟，插鬢傷早白。登高望山海，滿目悲古昔。遠

訪投沙人因為逃名客故交竟誰在獨有崔亭伯重陽  
不相知載酒任所適手持一枝菊調笑二十石日暮岍  
幘歸傳呼湓阡陌彤檐雙白鹿賓從何輝赫夫子在其  
間遂成雲霄隔良辰與美景兩地方虛擲晚從雨霽歸  
蘿月下水壁却登郡樓望松色寒轉碧咫尺不可親棄  
我如遺鳥

九卿天上落五馬道傍來列戟朱門曉褰帷碧嶂開登  
高望遠海名客得英才紫綬歡情洽黃花逸興催山從

圖上見溪即鏡中迴遙羨重陽作應過戲馬臺

九日登巴陵置酒望洞庭水軍

時賊逼  
華容縣

九日天氣清登高無片雲造化闢川岳了然楚漢分長  
風鼓橫波合沓蹙龍文憶昔傳遊豫樓船壯橫汾今茲  
討鯨鯢旌旆何繽紛白羽落酒樽洞庭羅三軍黃花不  
撥手戰鼓遙相聞劍舞轉頽陽當時日停曛酣歌激壯  
士可以摧妖氛齏醢東籬下泉明不足羣

九日龍山飲



九日龍山飲黃花笑逐臣醉看風落帽舞愛月留人

九日

今日雲景好水綠秋山明攜壺酌流霞舉菊泛寒榮地  
遠松石古風揚絲管清窺觴照歡顏獨笑還自傾落帽  
醉山月空歌懷友生

九日登山

淵明歸去後不與世相逐為無杯中物遂偶本州牧因  
招白衣人笑酌黃花菊我來不得意虛過重陽時題輿

何駿發遂結城南期築土接響山俯臨遠水湄胡月叫  
玉笛越女彈霜絲自作英王冑斯樂不可窺赤鯉湧琴  
高白龜道冰夷靈仙如髣髴真醑遙相知古來登高人  
今復幾人在滄洲違宿諾明日猶可待連山似驚波合  
沓出溟海揚袂揮四座酩酊安所知齊歌送清觴起舞  
亂參差賓隨落葉散帽逐秋風吹別後登此臺願言長  
相思

九日藍田崔氏莊

杜甫

老去悲秋強自寬興來今日盡君歡  
羞將短髮還吹帽笑倩傍人爲正冠  
藍水遠從千澗落玉山高並兩峰寒  
明年此會知誰健更把茱萸子細看

九日楊奉先會白水崔明府

今日潘懷縣同時陸浚儀坐開桑落酒  
來把菊花枝天宇清霜淨公堂宿霧披  
晚酣留客舞烏鳥共差池

九日陪溥侍中宴白樓

露白菊氤氲西樓盛襲文玉筵秋令節  
金鉞漢元勲說

劍風生坐拍琴鶴遶雲謏儒無以答願得備前軍

九日奉陪侍中宴後亭

玉堂傾菊酒一顧得淹留綵筆徵枚叟花筵舞莫愁管絃能駐景松桂不停秋為謝蓬蒿輩如何霜霰稠

九日奉陪令公登白樓同詠菊

瓊罇有仙菊可以獻留侯願此三花秀非同百卉秋金英分藥細玉露結房稠黃雀知恩在銜飛亦上樓

九日同司直九叔崔侍御登寶鷄南樓

把菊歎將老上樓悲未還短長新白髮稠疊舊青山霜  
氣清衿袖琴聲引醉闌竹林唯七友何幸亦登攀

和趙端公九日登石亭上和州家兄

洛浦想江津悲歡共此晨採花湖岼菊望國舊樓人雁  
別聲偏苦松寒色轉新傳書問漁叟借冠爾何因

九日奉寄嚴大夫

九日應愁思經時冒險艱不眠持漢節何路出巴山小  
驛香醪嫩重巖細菊斑遙知簇鞍馬回首白雲間

九日贈司空曙

李端

我有惆悵調待君醉時說  
長來逢九日難與菊花別  
摘却正開花  
斲言花未發

重陽宴集

同用寒字

張登

錫宴逢佳節窮荒亦共歡  
恩深百日澤雨借九秋寒  
望歲人謠洽臨風客況難  
座移山色在杯盡菊香殘  
欲識投醪遍應從落帽看  
還宵須命燭舉手謝三官

九日宴集

唐德宗

朕在位行將十載實賴忠賢左右克致小康是以擇  
三令節錫茲宴賞俾大夫卿士得同歡洽也夫共  
其感者同其歡榮有其初者貴其終始資爾羣寮順  
朕不暇樂而能節職司其憂咸若時則庶乎理矣因  
重陽之會聊示所懷

早衣對庭燎躬化勤意誠時此萬機暇適與佳節并曲  
池潔寒流芳菊舒金英乾坤爽氣澄臺殿秋光清朝野  
慶年豐高會多歡聲永懷無荒戒良士同斯情

重陽日中外同歡以詩言志因示羣官

爽節在重九物華新雨餘  
清秋黃葉下菊散金潭初  
萬寶行就稔百工欣所如  
歡心暢遐邇殊俗同車書  
至化自敦睦佳辰宜宴胥  
鏘鏘間絲竹濟濟羅簪裾  
此樂匪足耽此誠期永孚

重陽日即事

令節曉澄霽四郊烟靄空  
天清白露潔菊散黃金叢  
寡德荷玄貺順時休百工  
豈懷歌鐘樂思與君臣同  
至化



在亭育相成資始終未知康衢詠所仰惟年豐

豐年多慶九日示懷

爽氣肅時令早衣聞朔鴻重陽有佳節具物欣年豐皎  
潔暮潭色芬敷新菊叢芳樽滿衢室繁吹凝烟空惠洽  
信吾道保和惟爾同推誠致玄化天下期為公

九日絕句

禁苑秋來爽氣多昆明風動起滄波中流簫鼓誠堪賞  
詎假橫汾發棹歌

奉和聖製重陽會聊示所懷 李泌

大唐造昌運品物荷時成  
乘秋適令節錫宴歡羣情俯

臨秦山川高會漢公卿

闕一韻

赤松子且泛黃菊英虞歌

聖人作海內同休明

奉和聖製重陽日百寮曲江宴示懷

崔元翰

偶聖睹昌期受恩慙弱質  
幸逢良宴會況是清秋日  
遠岫對壺觴澄瀾映簪紱  
魚羔備豐膳集鳳調鳴律  
薄劣

厠英豪歡娛忘衰疾平臯行雁下曲渚雙鳬出沙岼菊  
開花霜枝果垂實天文見成象帝念資勤恤探道得玄  
珠齋心居特室豈如橫汾唱其事徒驕逸

奉和聖製九日言懷賜百僚 權德輿

令節在豐歲皇情喜又安絲竹調六律簪裾列千官烟  
霜莫景清水木秋光寒筵開曲池上望盡終南端天文  
麗慶霄墨妙驚飛鸞願言黃花酒永奉今日歡

奉和聖製重陽日中外同歡以詩言志示羣臣

玉醴宴佳節拜恩歡有餘煌煌菊花秀馥馥萸房舒白  
露秋稼熟清風天籟虛和聲度簫韶瑞氣深儲胥百辟  
皆醉止萬方今晏如宸衷在化成藻思煥瓊琚微臣徒  
竊抃豈足歌唐虞

奉和聖製重陽日即事

佳節在陽數至歡朝野同恩隨千鍾洽慶屬五稼豐時  
菊洗露華秋池涵霽空金絲響仙樂劒鳥羅宗公天道  
光下濟睿詞敷大中多慙擊壤曲何以答堯聰

奉和聖製豐年多慶九日示懷

寒露應秋杪清光澄曙空澤均行葦厚年慶華黍豐聲  
明暢八表宴喜陶九功文麗日月合樂和天地同聖言  
在推誠臣職惟匪躬瑣細何以報翺飛淳化中

嘉興九日寄丹陽親故

窮年岐路客西望思茫茫積水曾南渡浮雲失舊鄉海  
邊尋別墅愁裡見重陽草露荷衣冷山風菊酒香獨謠  
看墜葉遠目遍秋光更羨登攀處烟花滿練塘

九日北樓宴集

蕭颯秋聲樓上聞  
霜峰漠漠起陰雲  
不見攜觴王太守  
空思落帽孟參軍  
風吟蟋蟀寒猶急  
酒泛茱萸晚易曛  
心憶舊山何日見  
併將愁淚共紛紛

歲時雜詠卷三十四

欽定四庫全書

歲時雜詠卷三十五

宋蒲積中編

重陽

奉陪李大夫九日龍沙宴會

遲字

權德輿

龍沙重九會千騎駐旌旗  
水木秋光淨絲桐雅奏遲  
烟蕪斂暝色霜菊發寒枝  
今日從公醉全勝落帽時

酬九日

重九共嬉娛秋光景氣殊他時頭似雪還對拙茱萸

和九日從楊氏姊遊宴

秋光風露天令節慶初筵易象家人吉閨門女士賢  
招邀菊酒會屬和柳花篇今日同心賞全勝落帽年

奉和聖製重陽日即事

武元衡

玉燭降寒露我皇歌大風重陽德澤展萬國歡娛同綺  
羅擁行騎香塵凝曉空神都自霸霸佳氣助葱葱律呂  
金石暢景光天地通徒然被鴻霈無以報玄功



奉和聖製豐年多慶九日示懷

令節窠宇泰神都佳氣濃  
賡歌禹功盛擊壤堯年豐  
九奏碧霄裏千官皇澤中  
南山澹凝黛曲水清涵空  
金玉美王度歡康謠國風  
睿文垂日月永與天無窮

九日小園獨謠

李吉甫

小園休沐暇暫與故山期  
樹杪懸丹棗苔陰落紫梨  
滿叢新菊徧繞樹古藤垂  
受露紅蘭晚迎霜白蕤  
肥土公留鳳詔冠劒俟清  
祠應念端居者長慙補袞  
詩

奉酬中書相公九日小園獨謠以元衡致齋禁  
省見寄六韻

齋沐限中禁  
家山傳勝遊  
露寒潘省夜  
木落庾園秋  
蘭菊回幽步  
壺觴絕舊儔  
位高天祿閣  
詞異畔牢愁  
孤思琴先覺  
馳暉水共流  
明朝不見客  
清祀在圓丘

奉和相公省中宿齋酬李相公見寄

鄭 綯

高閣安仁省  
名園廣武廬  
沐蘭朝太乙  
種竹詠華胥  
禁

靜疎鐘徹庭開爽韻虛洪鈞齊萬物縹帙整羣書寒露  
滋新菊秋風落故萼同懷不同賞幽意竟何如

九日廣陵同陳五先輩登高 歐陽詹

客路重陽日登高寄上樓風烟今令節臺閣古雄州泛  
菊聊斟酒持萸嬾插頭情人共惆悵良友不同游

九日廣陵登高懷邵二先輩

簪萸泛菊俯平阡飲過三杯却惘然十歲此辰同醉友  
登高各處已三年

九日

皎然

重陽荆楚尚高會此難陪偶見登龍客同遊戲馬臺風  
文回水疊雲態擁歌迴持菊煩相問含情愧不來

九日菊花詠應制

廣宣

可訝東籬菊能知節候芳細枝青玉潤繁葉碎金香爽  
氣浮朝露濃姿帶夜霜泛杯傳壽酒應共樂時康

重陽夜集蘭陵居與宣供奉聯句

蟋蟀催寒服茱萸滴露房酒巡明刻燭籬菊暗尋芳

李益

新月知秋露繁星混夜霜登高今夕事九九是天長

廣宣

九日黃白二菊花盛開對懷劉二十八

西花雖未謝二菊又初芳  
鬢雪徒云白腰金未是黃  
曙光凌露彩宵艷射星芒  
日正開偏足風清發更香  
山椒應散亂籬下倍熒煌  
泛酒遙相憶何由共醉狂

奉和相公九日對黃白二菊見懷

劉禹錫

素萼迎寒秀金英帶露香  
繁華照旄鉞榮盛對銀黃  
琮

壁文輝映衣裳雜彩章晴雲遙蓋覆秋蝶近悠揚空想  
逢九日何由陪一觴滿鼓佳氣在未肯委嚴霜

九日言懷

令狐楚

二九即重陽天清野菊黃近來逢此日多是在他鄉晚  
色霞千片秋聲雁一行不能高處望恐斷老人腸

奉和嚴司空重陽日同崔常侍崔郎中及諸公  
登龍山落帽臺佳宴

謝公秋思渺天涯蠟屐登高為菊花貴重近臣光綺席

笑憐從事落烏紗  
萸房暗綻紅珠朶  
茗碗寒供白露芽  
詠碎龍山歸出號  
馬奔流電妓奔車

九月九日登高

劉禹錫

世路山河險  
君門烟霧深  
年年上高處  
未省不傷心

九日登西原宴望

同諸兄弟作

白居易

病愛枕席涼  
日高眠未輟  
弟兄呼我起  
今日重陽節  
起登西原望  
懷抱同一豁  
移座就菊叢  
饒酒前羅列  
雖無絲與竹  
歌笑隨情發  
白日未及傾  
顏酡耳已熱  
酒酣四

面望六合何空濶天地自久長斯人幾時活請看原下  
村村人死不歇一村四十家哭葬無虛月指此各相勉  
良辰且歡悅

九日登巴臺

黍香酒初熟菊暖花未開閒聽竹枝曲淺酌茱萸杯去  
年重陽日漂泊湓城隈今歲重陽日蕭條巴子臺旅鬢  
尋已白鄉書久不來臨觴一搔首座客亦徘徊

禁中九日對菊花酒憶元九

元九詩曰不是花  
中唯愛菊此花開



盡更  
無花

賜酒盈杯誰共持  
宮花滿把獨相思  
相思祇傍花邊立  
盡日吟君詠菊詩

九日寄行簡

摘得菊花攜得酒  
遶村騎馬思悠悠  
下邳田地平如掌  
何處登高望梓州

同崔員外綦母檢九日宴京兆府

今日好相見  
羣賢仍廢曹  
晚晴催翰墨  
秋興引風騷  
絳

葉擁虛砌黃花隨濁醪閉門無不可何事更登高

九月八日酬皇甫十見贈

君方對酒綴詩章我正持齋坐道場處處追遊雖不去  
時時吟咏亦無妨霜蓬舊鬢三分白露菊新花一半黃  
惆悵東籬不同醉陶家明日是重陽

九月八日

司空圖

已是人間寂寞花解憐寂寞傍貧家老來不待登高看  
更堪殘春惜歲華

九月十日即事

李白

昨日登高罷今朝更舉觴菊花何太苦遭此兩重陽

九月八日送蕭少府歸洪州 皎然

明日重陽今日歸布帆微雨望霏霏行過鶴渚知堪住  
家在龍沙意有違

九月十日

愛寄柴桑隱名溪近訟庭掃沙開野步搖舸出閒汀宿  
簡邀詩伴餘花在酒瓶悠然南望意自有峴山青

九月十日即事

嚴維

貧家惟種竹時幸故人看菊度重陽  
少林經閏月寒宿醒猶落帽華髮強扶冠  
美景良難得今朝更盡歡

又

陳羽

漢江天外東流去巴塞連山萬里秋  
節過重陽人病起一枝殘菊不勝愁

九月十日郡樓獨酌

羊士諤

掾吏當授衣郡中稀物役嘉辰悵已失  
殘菊誰為惜櫺

軒一樽泛天景洞虛碧暮節猶賞心寒江鳴湍石歸期  
北州里舊友東山客飄蕩雲海深相思桂花白

歲時雜詠卷三十五

欽定四庫全書

歲時雜詠卷三十六

宋 蒲積中 編

重陽

九日次定國韻

蘇軾

朝菌無晦朔蟪蛄疑春秋南柯已一世我眠未轉頭  
仙人視吾曹何異蜂螳稠不知蠻觸氏自有兩國憂  
我觀去來今未始一念留奔馳竟何得而起無窮羞  
王郎誤涉世屢獻久不酬黃金散行樂清詩出窮愁  
俛仰四十

年始知此生浮軒裳陳道路往往兒童收封侯起大第  
或是君家騶似聞負販人中有第一流炯然徑寸珠藏  
此百結裘意行無車馬倏忽略九州邂逅獨見之天與  
非人謀笑我方醉夢衣冠戲沐猴力盡病騏驥技窮老  
伶優北山有靈根寸田自可耰會當無何鄉同作逍遙  
遊歸來城郭是空有纍纍丘

九日黃樓作

去年重陽不可說南城夜半千漚發水穿城下作雷鳴



泥滿城頭飛雨滑黃花白酒無人問日暮歸來洗靴襪  
豈知還復有今年把盞對花容一呷莫嫌酒薄紅粉陋  
終勝泥中千柄揷黃樓新成壁未乾青荷已落霜初殺  
朝來白露如細雨南山不見千尋剝樓前便作海茫茫  
樓下空聞櫓鴉軋薄寒中人老可畏熱酒澆腸氣先壓  
烟消日出見漁村遠水鱗鱗山巒巒詩人猛士雜龍虎  
坐客三十餘人皆知名之士楚舞吳歌亂鶩鴨一杯相屬君勿辭此  
境何殊泛清霄

丙子重九

窮途不擇友過眼如亂雲餘子誰復數坐閱兩使君共  
飲去年堂俯看秋水紋此人與此水相追兩泫泫老去  
各休息造物嗟長勤佳哉此令節不惜與子分何以娛  
我客遊魚在清瀆水師三百指鉄網欲掩羣獲多雖一  
快買放尤可欣此樂真不朽明年我歸耘

九日

三年瘴海上越嶠真我家登山作重九蠻菊秋未花惟

有黃茅根堆龍生，拗窠蜚酒蘖衆毒。酸甜如梨查，何以  
侑一樽。鄰翁餽鼃蛇，亦復強取醉歡謠。雜悲嗟，今年吁  
惡歲。僵仆如亂麻，此會我雖健。狂風卷朝霞，使我如霜  
月。孤光挂天涯，西湖不欲往。暮樹號寒鴉。

九日湖上尋周李二君不見，君亦見尋於湖上。  
以詩見寄，明日乃次其韻。

湖上野芙蓉，含思愁脉脉。娟然如靜女，不肯傍阡陌。詩  
人杳未來，嬋艷冷難宅。君行逐鷗鷺，出處浩莫測。葦間

聞挈音雲表已飛屐使我終日尋逢花不忍摘人生如  
朝露要作百年客喟彼終歲勞幸茲一日澤願言竟不  
遂人事多乖隔悟此知有命沈幽傷魂魄

和陶淵明九日閒居

并序

明日重九雨甚輾轉不能寐起索酒和淵明一篇醉  
熟昏然殆不能佳也

九日獨何日欣然愜平生四時靡不佳樂此古所名龍  
山憶孟子栗里懷淵明鮮鮮霜菊艷溜溜糟牀聲閒居

知令節樂事滿餘齡登高望雲海醉覺三山傾長歌振  
清商起舞帶索縈坎軻識天意淹留見人情但願飽杭  
稌年年樂秋成

和陶淵明己酉歲九月九日

并序

十月初吉菊始開乃與客作重九因次韻淵明己酉  
歲九月九日一首胡廣飲菊潭水而壽然李固傳贊  
云其視胡廣趙戒猶糞土也

今日我重九誰謂秋冬交黃花與我期草中實後彫香

餘白露乾色映青松高悵望南陽野古潭霏慶霄伯始  
真糞土平生夏畦勞飲此亦何益內熱中自焦持我萬  
家春一酌五柳陶夕英韋可掇繼此木蘭朝

九日尋臻閣梨遂泛小舟至懃師院

二首

白髮常嫌歲月侵病眸兼怕酒杯深南屏老宿閒相過  
東閣郎君懶重尋試碾露芽烹白雪休拈霜蕊嚼黃金  
扁舟又截平湖去欲訪孤山支遁林

湖上清山翠作堆蔥蔥鬱鬱氣佳哉笙歌鼓裏抽身出

雲水光中洗眼來，白足赤鬚迎我笑。  
拒霜黃菊為誰開？明年桑苧煎茶處。  
憶著先公首重回。

皎然有重九日與陸羽煎茶詩，羽自

稱桑苧翁

王鞏屢約重九見訪，既而不至，以詩送將官梁

交，且見寄次韻答之。

交頗文雅，不類武人家有侍者甚慧麗。

知君月下見傾城，破恨懸知酒有兵。  
老守無何惟日飲，將軍競病自詩鳴。  
花枝不共秋歌帽，筆陣空來夜斫營。  
愛惜微官將底用，他年只好寫銘旌。

九日邀仲屯田為大水所隔以詩見寄次其韻  
無復龍山對孟嘉西來河伯意雄夸霜風可使吹黃帽  
舟人黃帽  
土勝水也樽酒那能泛浪花謾遣鯉魚傳尺素却將燕  
石報瓊華何時得見悲秋老醉裏題詩字半斜

明日重九亦以病不赴述古會再用前韻

月入秋帷病枕涼霜飛夜簾故衾香可憐吹帽狂司馬  
空對親春老孟光不作雍容傾坐上翻成骯髒倚門旁  
人間此會論今古細看茱萸感歎長



次韻王廷老和張十七九日見寄

霜葉投空雀啁籬上樓筋力强扶持對花把酒未甘老  
膏面染鬚聊自欺無事亦知君好飲多才終恐世相縻  
請看平日銜杯口會有金椎為控頤

再次韻

千戈萬槊擁笳籬九日清樽豈復持

是日南都  
勅使按兵

官事無

窮何日了菊花有信不吾欺逍遙瓊館真堪羨取次塵  
纓未可縻迨此暇時須痛飲他年長劔挂君頤

次韻蘇伯固主簿重九

雲間朱袖拂雲和知是長松挂女蘿  
髻重不嫌黃菊滿手香新喜綠橙  
搓墨翻衫袖吾方醉紙落雲烟子  
患多只有黃雞與白日玲瓏應識使  
君歌

九日袁公濟有詩次其韻

古來靜治得清閒我貴真常也一班  
舉酒東榮挹江海回樽落日見湖  
山平生傾蓋悲歡裏早晚收身簿  
領間笑指西南是歸路倦飛羽翼  
久知還

九日次定國韻

我醉歌時君罷休已教從事向青州  
鬢霜饒我三十尺  
詩律輸君一百籌  
聞道郎君閉東閣  
且容老子  
上南樓  
相逢不用空歸去  
明日黃花蝶也愁

次韻定國九日詩

東坡在彭門與定國為九日黃樓之會  
今復以是日  
相遇於宋凡十五年矣  
憂樂出處有不可勝言者而  
定國學道有得  
百念灰冷而顏益壯  
顧予衰病心形

俱瘁感之作詩

菊盞茱囊自古傳長房寧復是臞仙應從漢武橫汾日  
數到劉公戲馬年對玉山人令老矣見恒河性故依然  
王郎九日詩千首今賦黃樓第二篇

八日就湖上會飲呈晏相公

明當是重九黃菊還開不先將掇其英秋遲未能有頽  
齡無以駐但不負此酒紅頰誰使歌公憐牛馬走

九日次壽州

昔人把菊望青楹  
今我持酒無黃花  
自催屋裏紅鱗膾  
不彈牆頭白項鴉  
壽春城高枕淮水  
綠蒲疎疎暮帆起  
登臨不學孟參軍  
帽墜山風費嘲紙

依韻和楊直講九日有感

也持黃菊藥時望  
白衣人苜蓿從來  
厭茱萸却乍親護  
霜雲不散吹帽客  
何貧莫要悲搖落  
秋花更勝春

次韻李晉裕教授九日見贈 張耒

滿酌聊酬菊藥黃  
登高仍在泰山陽  
笑談嘉節賓朋集

樽酒清驩興味長倦客得閒惟欲飲老人雖醉不成狂  
先生莫歎蘼鹽久行見高才穎出囊

九日懷道孚

吾甥頗似魏家舒新罷推囚却著書顧我獨傾陶令酒  
思君同膾季鷹鱸蒼茫雲物秋將晚寂寞山城誰與娛  
儵忽風光行老矣躊躇不去獨何歟

和彥昭九日西湖會飲

故人憐寂寞九日共登臨天地客行遠山河秋已深狂

來能醉舞興罷獨悲吟莫怪淒涼甚多憂損壯心

九月十日園菊爛開書絕句

蕭條秋圃風飛葉却有黃花照眼明已過重陽慵采擷  
自嫌亦作世人情

九月九日夜雨留智叔

陳師道

騎臺九日登臨處只有歸人醉扶路千年二謝孰可代  
我每苦留君只去花粗且為前人惜曲誤不解丞卿怒  
只消著帽受西風不待風流到新句

九日與智叔鵬堂宴集夜歸

鵬堂從昔有惡客酒盡不去仍復索欲留歌舞盡客意  
風雨和更作三厄佳辰難得客更難我窮無酒為君歡  
只欲泥行過白下萬一簾疎見一班

九日寄秦觀

疾風回雨水明霞沙步鰲祠欲莫鵬九日清樽欺白髮  
十年為客負黃花登高懷遠心如在向老逢人意有加  
淮海少年天下士獨能無地落烏紗



次韻李節推九日登南山

平林廣野騎臺荒，山寺鳴鐘報夕陽。  
人事自生今日意，寒花只作去年香。  
巾歌更覺霜侵鬢，語妙何妨石作腸。  
落木無邊江不盡，此身此日更須忙。

九日不出魏衍見過

九日登臨迫閉藏，老懷無限自淒涼。  
山頭落帽風流絕，壁面稱詩語笑香。

南山有二  
謝詩石

衝雨肯來尋此老，拂床聊

待熟黃梁獨無樽，酒為君壽正使秋花未肯黃。

是日  
無菊

九月九日魏衍見過

節裏能相過談閒可解憂致疎君未肯得此我何由語  
到君房妙詩同客子游一經從白首萬里有封侯

懷安官舍病起九日作

蘇易簡

籬菊今年折最繁繞叢新折上雕盤病知嘉節霜風冷  
喜對高堂骨肉懽久廢笑歌慵飲酒只聞兒女勸加餐  
如何猛下藜床去又逐鴛鴻振羽翰

十日菊

寂寞東籬下凝烟簇簇芳無人賞幽艷有蝶戀清香不  
伴茱萸飲空教蟋蟀藏重陽雖已過來歲可能忘

重陽述懷

屋頭寒雀作飢聲大都因節物驚九日縱拚經夕飲  
百年能病幾番醒白衣於我似無舊黃菊對人偏有情  
醉裏高歌開口笑世間名利一毫輕



歲時雜詠卷三十六

欽定四庫全書

集部

歲時雜詠卷

三十七至  
四十二

詳校官庶吉士臣柳邁祖

助教臣常循覆勘

總校官中書臣朱鈐

校對官典簿臣郭祚熾

謄錄監生臣葉世華

欽定四庫全書

歲時雜詠卷三十七

宋 蒲積中 編

重陽下

九日藥市作

宋 祁

陽九協嘉辰斯人始多暇五藥會廣廛  
將肩開相駕靈品羅賈區仙芬冒闥舍  
擷露來山阿斲烟去巖罅係道雜提攜  
盈檐更薦藉乘時物無賤投之利能射  
饗苓互作王參薺交相假音架曹植謹  
雁令韓康無二價西南歲

多癘卑濕連春夏佳劑止刀圭千金厚相謝刺史主求  
瘼萬室繫吾化顧賴藥石功捫衿重慙喏

九日侍宴太清樓

洊九標佳節中天駐翠輿晨光清複道秋色徧儲胥畦  
稻霜成後宮橙露飽初省收紆步玉拜賜儼華裾

皇帝臨視

刈稻宣許從臣同觀又令觀燈訖並賜張稻新米

曼衍來長樂鴟夷下屬車帝

韶儀瑞鷗玉藻躍恩魚霽霧供披拂涼風助掃除高陽  
穿葉外仙菊汎花餘寒入弓聲厲觀留酒算徐神池元

不浪溫樹未曾疎帝眷憑秋稼臣心仰夏渠承平將樂  
事併入史臣書

九日宴射

佳節憑高駐綵旗亭臯霧罷轉晨曦墀間羽集號猿後  
臺外塵飛戲馬時芳菊治病爭汎藥丹萸辟惡徧傳枝  
明年此會知何處醉玉頽山不用辭

和晏相公九日郡筵

令序凝秋籥歡游駐使軒行觴酒壽密踏節舞鞞翻榴



熟丹房解更香紫粒繁風頭獵輕慘日脚送斜暄鏤管

新篇逸

轉運學士  
即席賦詩

吹花舊俗存請為丞相壽長久慶調

元

十日宴江濱亭

節去歡猶在賓來賞更延悠揚初短日淒緊乍寒天霽  
沼元非漲秋花自少妍蟻留新獻耐蕙續不殘烟河鰓  
衝餘藻游龜避折蓮流芳真可惜從此遂凋年

九日食糕有詠

飈館輕霜拂曙袍  
糗資花飲鬪分曹  
劉郎不敢題糕字  
虛負詩中一世豪

夢得嘗作九日詩欲用糕字思五經中無之輟不復為又白樂天呼為詩

九日置酒

秋晚佳辰重物  
華高臺悵飲駐鳴笳  
邀歡任落風前帽  
促飲爭吹酒上花  
溪態澄明初畢雨  
日痕清淡不成霞  
白頭太守真愚甚  
滿挿茱萸望辟邪

九日

商館憑高爽氣濃  
露更千穗拂枝紅  
餅食交遺嘉籩上  
藥菊爭吹壽筇中  
擊隼勵威平隰濶  
戲駢沈響故臺空  
何人盛繼龍山集  
醉帽須防穀鬱風

閏九月九日登高有感

隔霜雲葉繞天愁  
閏節重來續舊遊  
賦客豈辭聊暇日  
楚人無奈剩悲秋  
寒萸實老猶薰佩  
晚菊香殘不占甌  
悵憶故園歸信斷  
渚鴻川鯉兩悠悠

九日

帝京蒙福近相國偃藩初瓮熟中齊酒厨鮮上客魚高  
懷日蕭散外物久驅除犀首無妨飲宣尼或飯蔬林涓  
疑野濶荷罷似池虛此樂憑誰辨須煩藻思餘

九日至衛南

良辰獨據鞍節物強相干酒駐衰顏淺風欺客帽寒暫  
吟非有屬倦曲不成歡多謝黃金意還如故國看

偶思桓景登高故事

桓景全家遂得仙佩萸吹菊對陶然汝南雞犬緣何事

不似淮王許上天

重陽不見菊

二首

戲馬佳辰菊未黃有人惆悵獨持觴  
心知不作匆匆意故欲凌寒走早霜

蜀地秋高未擬寒翠苞如粒露方乾  
重陽已過君休恨留取金英日日看

九日憑高有感

把酒憑高念歲華此身流滯屬天涯  
故園叢菊無人賞

露壓風欺只自花

九日

長愛鴨陂頭平波澹不流相君時獨汎准擬五湖舟

次韻和司空相公閨秋重九中書對菊

晏殊

兩掖儀台峻珍叢應序黃積分迴令節伏檻賞幽芳昧  
谷重延律仙州剌借霜冒寒知惹苦逾分得荃香漢幄  
羣生遂虞廷萬事康與人同所樂留翫屬澄觴

九日北郡登高見寄

前日登高泛玉卮，擊銅賡唱有新辭。  
如何偶作銷魂別，又復重吟把菊詩。  
上苑盍簪延景刻，北都投轄盛官儀。  
煩君見想懽言者，可奈衡門絕貢綦。

近日諫臣請二府罷接賓以專國論

執政奏許休務日見客常日則門無車馬矣

九日宴集和徐通判韻

散挿黃花兩佩萸，粉饘蓬餌醕觴初。  
清歌咽後雲生袂，妙舞翻時雪滿裾。  
上客來香逢木蜜，佳人投釣得王餘。

秋光屈指猶三七莫向賓朋綺宴疎

次韻和史館呂相公九日偶成

時史館充大內修葺使罷重陽苑宴

鳳閣千門制不奢上公精意在朝家  
重陽蜜餌承班詔西苑瓊樽輟泛花  
蕭相未央功已半漢皇宣室宴非賒  
由來位極妨行樂目斷黃壚酒旆斜

八日菊

是日與集賢彭祕書承集賢王寺丞琪良水富監丞弼王進士許西園會飲同

賦此題洎酒胡一章薄暮王殿中軫見訪因亦與會

瑞藁才半折金蘂已爭妍  
幸得重陽近貪為一日先登



高謀宿約泛酒試芳筵詰旦尋餘馥明知賞愛偏

重陽夕內宿

把菊醒陶酒揚鞭入漢闈聚蚊秋未息獨鳥暮先歸世  
有涼暄隔人無今昨非悠然倒館佩頻夢北山薇

九月八日游渦

徐通判李譙縣楊察監  
丞朱從道縣尉同之

黃花夾徑疑無路紅葉臨流巧勝春前去重陽猶一日  
不辭傾盡蟻醪醇

閏九月九日

閨秋重九再佳辰猶見黃花裛露新更作登高亦何害  
恨無彭澤苦吟人

重陽日會有美堂南望

蔡襄

越邑吳封此地分高堂繁吹半空聞山峰高下抽青筍  
江水東西卧白雲菊蕊芬芳初應節松枝照曜欲迎曛  
州人不見歸時醉未擬風流待使君

北園登高即事呈諸同僚

江雲寒薄不成霜九日登高菊未黃飛鏑有聲弓已力

小槽分溜酒初嘗  
秋容行見丹楓老  
客意難勝紫陌長  
曾是禁園風物好  
故鄉時節可能忘

九日許當世以詩見率登高

霜雲明淨海山隈  
一歲登臨始北回  
堂上壽觴淋浪滿  
欄邊叢菊似疑開  
故鄉情味人生好  
今日恩榮使節來  
正是秋風洗煩暑  
力將衰颯上高臺

九日分題

得湖字

張無盡

十里澄波接縣郭  
曲江勝餞號東湖  
園林晚境歸無盡

道德遺風想吉夫九日昔人傳落帽一時吾輩共攜壺  
丹青國手微加意未必姑蘇有此圖

同前

得臺字

楚郊極目望蓬萊地勢高高獨此臺豈為登臨邀爾飲  
應教意思廓然開太虛蕩蕩觀無極俗賞區區勞數杯  
多謝紅茱與甘菊應時納祐亦奇哉

九日赴宴不及簡館中同寮 劉筠

野趣風流屬此辰帝臺高會敬重茵絳囊為佩仙萸密

綠醞飛觴壽菊新兼豆豐盈堯箴饌雅歌清壯漢營人  
年來多病歡遊阻溫玉蒼葭豈易親

黔中重九

澤國秋殘已可傷佳辰愈是覺淒涼鏡中謾歎頭都白  
籬下那堪菊未黃老去情深多感舊登高心緒只思鄉  
臨風莫使陶陶醉酒欲醒時更斷腸

九日登屏嶂山

屏嶂山頭酒百鍾年年清景屬山翁  
惟人白髮落何處

勸客黃花開數叢入峽路盤深地底出瀧船下半天中  
仕途巖嶮時情薄莫愛嘉魚鱠縷紅

次韻和縣樓九日

紅葉青峰轉目圍茱萸香重菊花肥已邀結駟共傾蓋  
不聽賓鴻催授衣漳浦亦攀風御起龍山還競羽觴飛  
但知歲歲佳辰在莫歎人間有是非

九日戴山戒珠寺作

秦望山前曉鴈斜戴山雲入看黃花誰能帶芥關心緒

且種茱萸伴物華  
歲計簿書寧有盡  
日生公事了無涯  
樽前況有兵厨酒  
不待兵厨酒亦賒

九日

節物驚心兩鬢華  
東籬空遶未開花  
百年將半仕三已  
五畝就荒天一涯  
豈有白衣來剝啄  
亦從烏帽自欹斜  
真成獨坐空搔首  
門柳蕭蕭噪晚鷗

九日汴中

旅棹出江湖  
漂然出更孤  
風波數破膽  
時事一長吁  
聞

說西羌使猶稽北苑誅欲言無上策且復醉茱萸

九日懷舍弟

重陽陶令節單闕賈生年秋色蒼梧外衰顏紫菊前登  
高知地盡引滿覺天旋去歲京城雨茱萸對惠連

九日獨酌

登高無老伴引滿自高歌歡喜天邊少重陽野外多黃  
花空歲月白首尚關河他日龍山興吾今在網羅

九日登堯山書事



滿頭黃菊鬢毛斑  
曾議皇王對爾顏  
今日臨風輕霸迹  
堯山應合勝牛山

九日 三首

霜冷風清九月九  
茱萸黃菊家園有  
何時玉殿接千官  
稱觴共進南山壽

陶家籬落菊花開  
醉擬西風立釣臺  
一座良交皆不見  
數聲燕鴈戛雲來

秋色蕭蕭野水邊  
茱萸時節菊花天  
明時未達青雲晚

惆悵登高又一年

重陽雨獨酌

蹋泥作客應狼籍帶雨微吟免鬱陶  
花滿山樽獨酌好  
靜中高味是登高

和景初九日登高不見菊

從來秋菊不曾栽敢向西風怨不開  
我自傷秋有高興  
非關特為看花來

九日集句

高秋寓目更徘徊

吳融

多少鄉心入酒杯

趙嘏

正被遶

籬荒菊笑

陸龜蒙

望中難見白衣來

李郢

和燕勉道九日

年年載病客天涯  
愁看秋風鴈字斜  
聊倚暮山消日月  
休題醉語壓烟霞  
薦君玄鶴千年壽  
泛我黃金萬點花  
歸去尚憐烏帽在  
孟翁頭髮映霜華

九日

采采堂前衣零亂  
滿筐筍桂枝欲自簪  
鬢髮吁可數因

之尋萬世乃是足下土利害何必問簪花式歌舞

客中九日

漸入黃花路徐登紅麥岡回頭望鄉樹車馬背斜陽逝  
矣歲華晚渺然歸興長風塵不須畏吾鬢舊蒼食

九日寄湛文之

今日喜九日東行復西行黃花侵馬路紅樹繞龜城樂  
歲知佳節登高宜晚晴遙憐湛夫子有酒不同傾

九日作

日暮鴻雁急天清雲物消此生餘幾許勝日得今朝老  
懶詩全閣悲傷酒屢饒能來望嵩阜鳩杖一聲高

九日招友人

萬點黃花薦壽杯欲君常見此花開莫嫌窮巷青泥滿  
不碍方明履板來

重九舟次太湖惜此佳時無菊可以自慰呼兒  
取綵菊戴之

綵花染出鬱金黃便似微聞裊裊香揷破角巾渾不惜

要知今日是重陽

九日與蔡伯世兄弟城上採菊伯世誦居仁九日絕句因用其韻

老頭未易見清香折取蕭蕭滿把黃歸去醵錢煩里社買糕沽酒作重陽

九日登武氏東山

秋色入東山丹黃若圖寫開林置齋館寓目盡原野佳節共登臨霜天若瀟洒二室對高峻雲烟相上下洛浦

接平蕪川光時變化下有神州路皇皇走車馬貴賤競  
紅塵役心忘晝夜流年悲過隙節去愁衰謝予心異於  
是委分從天假不復慮死生疇能校用舍對景自無感  
逢歡有餘暇北海酒盈樽東籬菊滿把芬芳必三嗅清  
醇須覆掌盡醉陶陶歸誰是整冠者

九日寄姪世衡

林紅零落菊花風塵世拘牽少會同獨把一盃思小阮  
故懷吟醉白雲中

秦岷道中值重九

李新

宮柳飄黃菊粲霜秦原沙冷值重陽  
縵山賸飫東籬秀浮掌應思蜀釀香  
霧日破峰寒峽靜黍田迷阜古岷長  
皇威革社連慈嶠亦變千箱與萬倉

西崗重九

周奉議座中  
賦得黃字韻

天涯一角見重陽  
瀟洒西風客斷腸  
麻紵未更今日白  
菊花還似去年黃  
陶潛把酒重開解  
宋玉臨牆乍感傷  
借問龍山歌會者  
座中誰認綠衣郎



忠告重九

出戶非吾識長安雖萬家有愁焦  
綠髮無語撚黃花酒  
僻喜宮醞衾寒怯絳紗欲傳此情  
況行客在天涯

重陽舟次高郵

途遠舟程未到家此身誰念客天  
涯東籬下破黃金蕊  
舊鬢新添白雪芽尊美不須添醬  
豉蟹肥無復羨魚蝦  
白衣送酒知何在疎放終難學孟  
嘉

重陽

簾簾辭勞始乞身夾衣溫麗燕和辰秋容刮黛披夭姣  
秣米長腰漱蟻困黃菊明朝為長物江山今日笑醒人  
不煩孫順貽嘲弄預對西風脫醉巾

閨重陽

鳳曆推移二十霜一回重見閨重陽稻杭收早醪將熟  
朔氣來時菊正香綠鬢不堪禁晚景醉杯聊可浣愁腸  
幽人百萬揚州鶴鼎足成歡未易當

九日羅江旅情呈文孺

山程十驛策駑來中路幾成興盡回旅次白醪饒客醉  
故園黃菊為誰開漏長更箭遲翻鼓坐久燈花細落煤  
不是學無經濟術道書教我壯心灰

次韻重陽節過月餘方和此韻

蜂愁節去已焉哉賓友追稱上宴臺詩韻此時傳我和  
酒樽當日為誰開光陰碌碌駒奔過氣候新新轂轉來  
身卦令辰如舞袖急忙須趲管絃催

故事登高會流風落帽文客樽常滿滿籬菊任紛紛馬

埽攄豪氣更囊想舊聞不須蘭作佩騷客恨如雲

重陽近有作

短晷西風冷殘秋令節頻菊花無幾日竹葉勸何人飽  
稻黃雞矮拋房紫栗新時來持此備未覺野夫貧

九日無菊

芳物及時難良辰曠野歡古園荒草莽秋雨禿闌干香  
桂風流減紅萸氣味單書紳懲淡飲活取宿根寒

重陽後有作

白酒賢人趣黃花道貌粧物情殊未厭時節不加長自  
是良辰往何妨復令張試看人化鬼不異露為霜

重陽後折菊泛酒

芳樽畢獻酬世態等閒休金盞香猶在騷人意重留泛  
觴詩老座作古飲家流從此重陽後慙慙送暮秋

重陽醞未熟無菊絕句

露寒黃菊怯芬芳入甕新醞未可嘗痛飲不須撞令節  
花開酒熟是重陽

又三絕戲老友

二十年中一度逢  
百年能見幾回重  
幽人樂事無由併  
且醉良宵瑪瑙鍾

西風學得不風流  
每怪衰逢末伏秋  
一陣酒樽飄醉帽  
故教人見老人頭

摘盡霜髭禿蝟髯  
年來地閣不任尖  
芙蓉為惜斑斑鬢  
着力風前壓帽簷

歲時雜詠卷三十七

欽定四庫全書

歲時雜詠卷三十八

宋 蒲積中 編

初冬 立冬附

十月一日初冬

杜甫

有瘴非全歇，為冬不亦難。  
夜郎溪日暖，白帝峽風寒。  
蒸裹如千室，焦糟幸一枰。  
茲辰南國去，舊俗自相歡。

初冬

垂老戎衣窄，歸休塞色深。  
漁舟上急水，獵火著高林。  
空



有習池醉愁來梁父吟干戈未偃息出處遂何心

洛下初冬拜表有懷

劉禹錫

鳳樓南面控三條拜表郎官早渡橋清洛曉光鋪碧簾  
上陽霜葉翦紅綃省門簪組初成列雲路鴛鴦想退朝  
寄謝殷勤九天侶槍榆水擊各逍遙

酬樂天初冬早寒見寄

元稹

乍起衣猶冷微吟帽半欹霜凝南屋瓦鷄唱後園枝洛  
水碧雲曉吳山黃葉時兩傳千里意書札不如詩

初冬夜坐憶桐城山行

梅堯臣

我昔吏桐鄉窮山使屢躡路險獨後來心危常自怯下  
顧雲容容前溪未可涉半崖風颭然驚鳥爭墮葉脩蔓  
不知名丹寶圻在英外端野鼠飛緣挽一何捷馬行聞  
虎氣豎耳鼻息歛遂投山家宿駭汗衣尚浹歸來撫童  
僕前事語妻妾吾妻嘗有言艱勤壯時業安慕終身閒  
笑媚看婦靨自是甘努力子今無所懾老大官雖暇失  
偶淚滿睫書之空自知城上鼓三疊

初冬偶成

清商忽已謝環堵緬清冬今晨起何早肅氣淒房櫳繁  
霜凜欲結霽霧迷長空理畦曉蔬盡收果高林空六年  
淮陽客歲歲風景同吁嗟吾老矣撫事思無窮

初冬道中

曾鞏

潦退蛟螭不可逃溪清潭澈見秋毫欲霜日射西山赤  
漸冷天騰北極高秀色更濃唯竹栢孤根先動是蓬蒿  
感時一撫青萍歎馬踏西風氣自豪

初冬

范成大

節令堅冰始民風古意淳  
星行窮少皞正歲述咸秦  
俗禮嫌端拜頭風強裹巾  
紅泥爐畔酒從此卜親鄰

初冬近飲酒作

天水邊陲南接蜀秦山翠照峨峨  
綠世間豈有糞金牛  
枉使五丁斧山玉罷侯置守自蜀始  
監郡東來兩成轂  
至今芙蓉城上土邦人猶記張儀築  
偏方遠僻坐井底  
豈知東國窮鋒鏃十月為正布時令  
方驗水行改周木

南征北戍幸息肩洒酒魚豚賀新屬祖龍妄意一至萬  
當道已聞神姬哭炎家天子起編戶政患嬴皇威令酷  
急於恩紀緩文法正歲尚猶傳五六吾民久已作秦民  
迄今十月猶遺俗野人何暇論年代但憶每逢多稼熟  
青裾女子翻茜袖抽鎌穫稻腰如束三時勤苦一時好  
自古有年非汝獨七雄爭戰已遙遠萬代興亡真返復  
洛誦徒勞口囁嚅不如屢把壺中醪

子寓邑中與諸子講學巨山姪孫轉示初冬書

事因用韻

霜風幾夕報初寒  
蟋蟀歸來已四遷  
舊物有氈眠軟暖  
講堂逢鱠饋新鮮  
功名久已遺清老  
征戍何由及晚年  
暴客更緣貧見外  
時危身老亦悠然

初冬小園寓目

獨樹喬松色閒雲  
淡落暉新霜黃橘  
重久雨翠梧稀暗  
雀鳴還啄高鳥定  
更飛散貂猶故在  
卒歲免無衣

立冬

立冬日

張無盡

己亥殘秋報立冬新新舊舊迭相逢  
定知天上漫漫雪又下人間疊疊峰  
無意自然成造化有形爭得出陶鎔  
夜來西北風聲惡拗折亭前一樹松

立冬夜舟中作

范成大

人逐年華老寒隨雨意增  
山頭望樵火水底見漁燈  
浪影生千疊沙痕沒幾稜  
峨眉欲還觀須待到晨興

龍遊舟中遇立冬二首

余安行

挂帆朝發龍遊浦  
天寒正下瀟瀟雨  
共道人間今日冬  
連檣處處歡相語  
我今與汝共孤舟  
寂寞舟中任水流  
人生自適乃為樂  
莫把閒腸生寸愁

一陽初復來江渚  
老龍漸起興雲雨  
人間令節偶斯辰  
君子道亨同笑語  
溪中朝夕往來舟  
去人何在水長流  
吾生塵世暫寄爾  
病死飢寒非我愁



歲時雜詠卷三十八

欽定四庫全書

歲時雜詠卷三十九

宋 蒲積中 編

冬至

冬至日小會

張華

日月不留四氣回周節慶代序萬國同休庶尹羣后奉  
壽升朝我有嘉禮式宴百僚繁肴綺錯旨酒泉淳笙鏞  
和秦磬管流聲上隆其愛下盡其心宣其壅滯詠之德  
音乃宣乃訓配享交泰永載仁風長撫無外

冬至

鮑 昭

舟遷壯甚笑水流孔亟歎景移風度改日至晷遷換渺  
渺負霜鶴皎皎帶雲鴈長河結蘭楫層冰如玉岼哀哀  
古老容慘顏愁歲晏催促時好過逼迫聚離散美人還  
未央鳴箏誰與彈

同前

宋傅亮

星昴殷仲冬短晷窮南陸柔荑迎時萋芳云應節馥

詠冬至

宋袁淑

連星貴初歷今自臨首歲薦樂行陰政登歌贊陽滯收  
涼降天德萌華宣地惠司瑞紀夜長書雲掌朝誓

冬至後丞相第詣世子車中作

沈約

廉公失權勢門館有虛盈貴賤猶如此況乃曲池平高  
車塵未滅珠履故無聲賓階綠錢滿客位紫苔生誰當  
九原上鬱鬱望佳城

五言畫堂良夜履長在節歌管賦詩列筵命酒

十韻成篇

得沓合答雜納  
颯匝欲拉閣

陳後主

李冬初陽始寒氣尚蕭颯原葉或委低岫雲時吐欲彫  
樹乍疎迴遠峰自重沓雲興四山霾風動萬籟答肅肅  
凝露下我我層冰合複殿可以娛於茲多延納迢迢百  
尺觀杳杳三休閣前後訓導屏左右文衛匝進退簪纓  
移縱橫壯思雜幸矣天地泰當無范睢拉

冬至日乾陽殿受朝

隋煬帝

北陸隆冬盛南至晷漏長端拱朝萬國守文繼百王至

德慚日用治道愧時康新邑建嵩嶽雙闕臨洛陽圭景  
正八表道路均四方碧空霜華淨朱庭皎日光纓珮既  
濟濟鐘鼓何煌煌文戟翊高殿采賁分修廊元首之明  
哲股肱資賢良舟楫佇有寄庶此王化昌

奉和冬至日乾陽殿受朝應制

牛弘

恭已臨萬寓宸居馭八埏作貢菁莪集來朝圭黼連司  
儀三揖盛掌禮九賓虔重欄映如壁一作碧複殿繞非烟

奉和冬至應教詩

隋蕭慤

天宮初動磬緹室已飛灰暮風吹竹起陽雲覆石來折  
冰開荔色除雪出蘭栽慙無宋玉辨濫吹楚王臺

和麴典設扈從東郊憶弟使往安西冬至日恨  
不得同申拜慶

李嶠

玉關方叱馭桂苑正陪輿桓嶺嗟分翼姜川限饋魚雪  
花含晚闕雲葉帶荆舒重此西流詠彌傷南至初

冬至後過吳張二子檀溪別業

孟浩然

卜築因自然檀溪不更穿園廬二友接水竹數家連直  
取南山對非關選地偏擇鄰依孟母共井得王宣魯是  
歌三樂仍聞詠五篇草堂時偃曝蘭棹日周旋外事情  
都遣中流性所便閑垂太公釣興發子猷船予亦幽棲  
者經過切慕馬梅花初臘月柳色半春天鳥泊隨陽鴈  
魚藏縮項鰖停盃問山簡何似習池邊

後至

杜甫



冬至至後日初長遠在劔南思洛陽青袍白馬有何意  
金谷銅駝非故鄉梅花欲開不自覺棣萼一別永相望  
愁極本憑詩遣興詩成吟咏轉淒涼

冬至遣興奉寄兩院遺補

去歲茲辰捧御床五更三點出鵷行欲知趨走傷心地  
正想氛氲滿眼香無路從容陪笑語有時顛倒著衣裳  
何人錯憶窮愁日愁日愁添一線長

冬日

年年至日長為客忽忽窮愁泥殺人江上形容吾獨老  
天邊風俗自相親杖藜雪後臨丹壑鳴玉朝來散紫宸  
心折此時無一寸路迷何處見三秦

小至

天時人事日相催冬至陽生春又來刺繡五紋添弱線  
吹葭六管動飛灰岸容待臘將舒柳山意衝寒欲放梅  
雲物不殊鄉國異教兒且覆掌中杯

至日遣興寄北省舊閣老兩院故人

憶昨逍遙供奉班去年今日侍龍顏麒麟不動香烟上  
孔雀徐開扇影還玉几由來天北極朱衣只在殿中間  
孤城此日空腸斷愁對寒雲日滿山

冬至夜寄京師諸弟兼懷崔都水

韋應物

理郡無異政所憂在素餐從令去京國羈旅當歲寒子  
月生一氣陽景極南端已懷時節感更抱離別酸私讌  
夕云罷還齋夜方闌邃幕沈空宇孤燭照床單應同茲

夕念寧忘故歲歡  
川途况悠邈  
涕下一闌干

冬至下寄舍弟時應試南京 丘為

去去知來遠  
依依甚初別  
他鄉千里心  
昨夜堦前雪  
終日讀書仍  
少孤家貧兄弟未當途  
適遠纔過宿  
春料相隨惟一平頭奴  
男兒出門事四海  
立身世業文章在  
莫漫憶柴扉  
駟馬高車朝紫微  
江南驛使不曾斷  
春前為爾作春衣

合肥至日愁中寄鄭明府 劉商

失計為卑吏三年滯楚鄉不能隨世俗應是昧行藏白  
壁空無玷黃沙只自傷暮天鄉思亂曉鏡鬢毛蒼灰管  
移新律窮陰變一陽歲時人共損幽憤日先長拙宦慙  
知己無媒誨自強迺羞薄命恩惠費餘光衆口誠難  
稱長川却易防魚竿今尚在行此棹滄浪

冬至日陪裴端公使君清水堂

皎然

亞歲崇嘉燕華軒照綠波渚芳迎氣早山翠問晴多推

往知時訓書羣辨政和從公惜日短留賞夜如何

冬至夜郡齋宴別前華陰盧主簿

并序

張登

范陽盧君道漳以適越人悅之稅車休徒三旬之間  
然後飭行李之命時日南至登與賓客僚吏會別於  
郡齋醺酒卜夜夜艾酒酣而不能自己故咸請詩之  
由是探韻而賦賦不出志大抵感時傷遠又  
美盧君擇其所從而惑闕頌征南有奔走之

德焉

虎宿方冬至鷄人積夜籌相逢一樽酒共結兩鄉愁王  
儉花為府廬謹幄內璆明朝更臨水悵望嶺南流

郊居冬至日荷李常侍見過 熊孺登

賤子守柴荆誰人記一作識姓名風雲千騎降草木一陽

生禮異江河動歡殊里巷驚稱觴容侍坐看竹許同行  
遇覺滄溟淺思疑太嶽輕盡搜天地物無踰此時情

長至日上公獻壽

張叔良

鳳闕晴鐘動鷄人曉漏長九重初啟鑰三事正稱觴日  
至龍顏近天旋聖歷昌休光連雪淨瑞氣雜爐香化被  
君臣洽恩沾士庶康不因稽舊典誰得紀朝章

同前

崔琮

應歷三陽首朝天萬國同斗邊看子月臺上候祥風五  
夜鐘初曉千門日正融玉階文物盛仙仗武貔雄率舞  
皆羣辟稱觴即上公南山為聖壽長對未央宮

同前

李竦



候曉金門闕乘時寶歷長羽儀瞻上宰雲物麗初陽漢  
禮方傳珮堯年正捧觴日行臨觀闕帝錫洽珪璋盛美  
超三代洪休降百祥自憐朝不坐空此詠無疆

南至日太史登臺書雲物 裴 達

園丘才展禮佳氣近初分太史新簪筆高臺紀彩雲烟  
空和縹緲曉色共氤氲道泰資賢輔年豐荷聖君恭惟  
司國瑞兼用察人文應念懷鈞客終朝望碧雲

同前

于尹躬

至日行時令登臺約禮文官稱伯趙氏色辨五方雲晝  
漏聽初發陽光望漸分司天為歲備持簡出人羣惠愛  
周微物生靈荷聖君長當有嘉瑞郁郁復紛紛

南至日隔仗望含元殿香爐

貞元六年

崔立之

千官荷長至萬國拜含元隔仗爐光出浮霜煙氣翻飄  
飄紫內殿漠漠澹前軒聖日開如捧卿雲近欲渾輪囷  
洒宮闕蕭索散乾坤願假天風便披香奉至尊

同前

冕旒親負展丹服盡朝天  
暘谷移初日金爐出御烟  
分馨流遠近散漫入貂蟬  
霜仗凝餘白朱欄應轉鮮  
如看浮闕在稍覺逐風遷  
為沐皇家慶來瞻羽衛前

同前

車 馬

抗殿疏元首高高接上玄  
節當南至日星是北辰  
天寶戟羅仙仗金爐引瑞烟  
霏微雙闕麗溶曳九州連  
拂曙祥光滿分晴曉色鮮  
一陽今在厯生植願陶甄

酬崔舍人冬至日宿直見寄 權德輿

令節一陽新西垣宿近臣曉光連鳳沼殘漏起鷄人白  
雪飛成曲黃鐘應律均層霄翔迅羽廣陌駐歸輪清切

晨趨貢恩華夜直頻輟才時所重

九月中楊閣老權知吏部選事

分命

秩皆真

十月中崔閣老正拜本官德輿正除禮部受命前一日分草詔詞

左掖期連茹

南宮愧積薪九年叨此地迴首倍相親

冬至日宿齋時郡君南內朝謁因寄

清齋獨向園丘拜盛服想君興慶朝明日一陽生百福

不辭相望阻寒宵

朔日冬至攝職南郊因書即事

大明南至慶天正朔旦圜丘樂六成文軌盡同堯歷象  
齋祠忝備漢公卿星辰列位祥光滿金石交音曉奏清  
更有觀臺稱賀處黃雲捧日瑞昇平

冬至後招于秀才

王建

日近山紅暖氣新一陽先入御溝春聞閒走馬重來此  
沐浴明年稱意身

至日登樂遊園

裴度

陰律隨寒改陽和應節生祥雲觀魏闕瑞氣映秦城  
駢炭論時政書雲受歲盈晷移長日至霧斂遠容清  
景暖仙梅動風柔御柳傾那堪封得意空對物華情

日南至

元和年  
吏部

獨孤鉉

王厯頒窮律凝陰發一陽輕暉猶惜短圭影比偏長  
晷度經南斗流晶盡北堂乍疑周戶耀可愛逗林光  
積雪消微煦初萌動渺茫更昇臺上望雲物已昭彰

冬至日祥風應候

節逢清景空占氣二儀中獨喜登臺日先知應候風瑞  
呈光燁化表慶感堯聰况與乘時叶還將入律同微微  
萬井徧習習九門通更遶爐烟起殷勤報歲功

邯鄲冬至除夜思家

白居易

邯鄲驛裏逢冬至抱膝燈前影伴身想得家中夜深坐  
還應說著遠行人

冬至夜懷湘靈

艷質無由見寒衾不可親何堪最長夜俱作獨眠人

冬至宿楊梅館

十一月中長至夜三千里外遠行人若為獨宿楊梅館  
冷枕單床一病身

冬至夜

老去襟懷常濩落病來鬚髻轉蒼浪心灰不及爐中火  
鬚雪多於砌下霜三峽南賓城最遠一年冬至夜偏長  
今宵始覺房櫳冷坐索寒衣說孟光



小歲日對酒吟錢湖州所寄詩

獨酌無多興閒吟有所思一盃新歲酒兩句故人詩楊  
柳初黃日髭髯半白時蹉跎春氣味彼此老心知

小歲日喜談氏外孫女孩滿月

今日夫妻喜他人豈得知自嗟生女晚敢訝見孫蓮物  
以希為貴情因老更慈新年逢吉日滿月乞名時因名珠

桂燎熏花果蘭湯洗玉肌懷中有可抱何必是男兒

至日上公獻壽酒

白敏中

候曉天門闕朝天萬國同瑞雲昇觀闕香氣映華宮日  
色臨仙籞龍顏對昊穹羽儀瞻百辟獻壽是三公化被  
君王洽恩沾草木豐自相朝玉座宴此詠皇風

冬至日寄小姪阿宜

杜牧

小姪名阿宜未得三尺長頭圓筋骨緊兩臉明且光去  
年學宦人竹馬遶四廊指揮羣兒輩意氣何堅剛今年  
始讀書下口三五行隨兄旦夕去斂手整衣裳去歲冬  
至日拜我立我旁祝爾願爾貴仍且壽命長今年我江

外今日生一陽憶爾不可見祝爾傾一觴陽德比君子  
初生甚微茫排陰出九地萬物隨開張一似小兒學日  
就復月將勤勤不自已二十能文章仕宦至公相致君  
作堯湯我家公相家劔佩常丁當舊第開朱門長安城  
中央第中無一物萬卷書滿堂家集二百編上下馳皇  
王多是撫州寫今來五紀強尚可與爾讀助爾為賢良  
經書括根本史書閱興亡高摘屈宋艷濃熏班馬香李  
杜泛浩浩韓柳摩蒼蒼近者四君子與古爭強梁願爾

一祝後讀書日日忙一日讀十紙一月讀一箱朝廷用  
文治大開官職場願爾出門去取官如駟羊吾兄苦好  
學學問不可量晝居府中治夜歸書滿床後貴有金玉  
必不為爾藏崔昭生崔芸李兼生窟郎堆錢一百屋破  
散何披猖今雖未即死餓凍幾欲僵叅軍與縣尉塵土  
驚匡勸一語不中治笞箠身滿瘡官罷得絲髮好買百  
樹桑稅錢未輸足得米不敢嘗願爾聞我語歡喜入心  
腸大明帝宮闕杜曲我池塘我若自潦倒看汝爭翱翔

摠語諸小道此詩不可忘

冬至日遇京使發寄舍弟

遠信初逢雙鯉去他鄉正遇一陽生  
樽前豈解愁家國輦下惟能憶弟兄  
旅館夜憂姜被冷暮江寒覺晏裘輕  
竹門風過還惆悵疑是松窓雪打聲

和湖州杜員外冬至日白蘋洲見憶

李郢

白蘋亭上一陽生謝朓新裁錦繡成  
千嶂雪消溪影綠

幾家梅綻海波清  
已知鷗鳥長來狎  
可許汀洲獨有名  
多愧龍門重招引  
即拋田舍棹舟行

冬至後西湖泛舟看斷冰偶成長句

一陽生後陰飈竭  
湖上層冰看圻時  
雲母扇搖當殿色  
珊瑚樹碎滿盤枝  
斜汀藻動魚應覺  
涵浦波生鴈未知

山影淺中留

一作流

瓦礫日光寒  
外送漣漪崖崩葦岼縱

橫散篙蹙蘭舟片  
段隨曾向黃河望  
衝激大鵬飛起雪  
風吹

江南冬至和人懷洛下

陸龜蒙

昔居青洛涯長恨苦寒時自作江南客稀逢下雪時有  
烟栖菊梗無凍落杉枝背日能尋徑臨風尚覆棋鳥聲  
渾欲轉草色固應知與看平湖上東流或片澌

冬至夜作

天復二年隨  
駕在鳳翔

韓 渥

中宵忽見動葭灰料得南枝有早梅四野便應枯草綠  
九重先覺凍雲開陰冰莫向河源塞陽氣今從地底迴  
不道慘舒無定分却憂蚊響又成雷

南至日

四首

司空圖

年年山壓壓來頻莫強孤危競要津  
吉卦偶成開病眼暖簷還葺寄羸身  
求仙自躁非無藥報國當材別有人  
鬢髮堪傷白已遍鏡中更待白眉新

今冬臘後無殘日故國燒來有幾家  
却恨早梅添旅思強偷春力報年華

花時不是偏愁我好  
事應難摠取他已被詩魔長役使  
眼中莫厭早梅多



年華亂後偏堪惜世路拋來已自生猶有玉真長命縷  
樽前時唱緩羈情

冬除夜書情

盧延讓

兀兀坐無味思量誰與鄰數星深夜火一箇遠鄉人鴈  
翦天微雪風號樹欲春愁腸自難過不覺苦吟頻

歲時雜詠卷三十九